

هو انتو جنس ابوكوا ايه

هو انتو جنس ابوكوا ايه
اللى ف عروقوا بيجرى سم
اللى ف عقولكم نار بتحرق أى حلم
أقسى ما هيقولوا البشر ما بيكفى دم
الدم كله حرام ... ودا مش أى دم
هو انتو جنس أبوكوا ايه
حتى الحجر يصعب عليه ...
دم الغلابة
ولا حتى هيهون قتلهم بين الديابة
خليتوا دنيتنا لعينة
نتمنى حتى تبقى غابة
أرحم أكيد من دنيا فيه
صنف مش مفهوم دا ايه
هو انتو جنس أبوكوا ايه
لا انتم بشر
ولا حتى شكل الحيوانات

ولا ليكو وصف
ملعون أبو الجدر
اللى بطرح من دا صنف
ملعون أبوكوا بكل دمة
أم محروقة عليه
هو انتو جنس أبوكوا ايه
وف أى ملة
واى دين
وبأى فكر
والا انتو خدتوا
غباوة العالم دا حكر
على ناس بتسجد
للى خلق الرحمة ... شكر
ولا هزكم نظرة خشوع
ظاهرة فى عينيه
هو انتو جنس أبوكوا ايه
يأجوج ومأجوج
خرجوا لينا بظلمهم وبجهلهم
مستطعمين لحم الغلابة
اللى ضعفان عضمهم

ما هو مستحيل هتكونوا
من غير نسلهم
علشان عينيكونا تتعمى
عن طفل ومربع ايديه
هو انتو جنس ابوكوا ايه

.....

انا شايفه ماشى فى ايد أبوه
فرحان أوى وبيزق أخوه
بيمدوا فى الخطوة وعاوزين يلحقوه
من قبل ما يكبر ... يقل الأجر ليه
هو انتو جنس أبوكوا ايه

.....

صلوا خلاص الركعتين واتربعوا
ارتاحوا بعد ما نهجوا لما اتسربعوا
والشيخ يقول وهم خاشعين بسمعوا
والقلب راضى والسكون حائل عليه
هو انتو جنس ابوكوا ايه

.....

الطلقة طالت

صدر اخوه ما بقاش يرد
والأب شاله بيجرى بيه
ومش مصدق انه جد
قابلوه بنفس الطلقة ...
ما بترحمش حد
وهو بصرخ ...
مالفزع طلعت عينيه
هو انتوا جنس أبوكوا ايه

.....

رافعين سلاحكوا
حتى فى وش الصبى وبتدبحوه
بيموت ومش فاهم
لا ايه ذنبه ولا ايه ذنب ابوه
بيموت مكانه ودمه بلعنكم ...
فى يوم راح تسمعوه
بيشل أركانكوا
وتتصرفوا بايديه
هو انتوا جنس أبوكوا ايه